

- अंता विधानसभा सीट माथे उपचुनाव सारु काल वोट पड़ेला— संवेदनशील मतदान केन्द्रां माथे बत्तो पुलिस जाबो तैनात करी ज्यो।
- सहकारिता मंत्री अमित शाह शहरी सहकारी बैंकां ने नौजवानां अर समाज रा वंचित तबकां रा लोगां ने मजबूत बणावण बाबत आगे आवण सारु कह्यो।
- राज्य मांय आयुष्मान आदर्श ग्राम योजना रा तैत काम सारु 210 गांव चुणी ज्यो— ईलाज रा पारम्परिक तरीकां ने बधावो दियो जावेला।
- प्रदेश मांय सीळो बायरो बाजणो सरु व्ह्यो— केई ठौड़ां पारो 15 डिग्री सेल्सियस ऊं नीचे उतर्यो।

000

अंता विधानसभा सीट माथे उपचुनाव सारु काल वोट पड़ेला। ई सारु मतदान री सगळी तैयारियां पूरी व्हे गयी है। ई विधानसभा हलका मांय संवेदनशील मतदान केन्द्रां माथे केंद्रीय सशस्त्र पुलिस बल रा जवान तैनात कर्या जा रह्या है। म्हाणा खबरनवीस बतायो के सामान्य मतदान केन्द्रां माथे हिफाजत रा पुख्ता बन्दोबस्त करी ज्यो है।

राज्य रा मुख्य निर्वाचन अधिकारी नवीन महाजन अर बारां रा जिला निर्वाचन अधिकारी हलका रा सगळा मतदातावां ऊं वोट जरूर देवण री अपील कीनी है। मतदाता पहचान पत्र-ईपिक रे अलावा फोटो लाग्योड़ा 12 दूजा कागजात बता र ई वोट दियो जा सकेला। वोट पड़बा रो काम पूरो व्हेवण पाछे इलेक्ट्रॉनिक वोटिंग मशीनां ने हिफाजत रा करड़ा इंतजाम बीचे बारां रा राजकीय स्नातकोत्तर महाविद्यालय मांय पूगायी जावेला। वोटों री गिणती 14 नवम्बर ने करी जावेला। अंता सीट माथे 2 लाख 27 हजार 563 जणा वोट देवण री काबिलियत राखे है। जिला निर्वाचन अधिकारी रोहिताश्व सिंह तोमर बतायो के सगळा पोलिंग बूथ माथे पोलिंग पार्टियां पूग गयी है। ई उपचुनाव मांय भाजपा रा मोरपाल सुमन, कांग्रेस रा प्रमोद जैन अर निर्दलीय उम्मीदवार नरेश मीणा बीचे करड़ो मुकाबलो व्हेवण रा आसार है। साल 2023 मांय व्ह्या विधानसभा चुनाव मांय अंता सीट ऊं भारतीय जनता पार्टी रा कंवरलाल मीणा जीत्या हा, पण एक जूना आपराधिक मामला मांय वां ने अदालत कानी ऊं दोषी करार दिया जावण पाछे ई साल मई महीना ऊं वां री विधानसभा सदस्यता रद्द कर दीरीजी ही। ई कारण अंता मांय उपचुनाव व्हे रह्या है।

000

केन्द्रीय सहकारिता मंत्री अमित शाह शहरी सहकारी बैंकां ऊं आगे बधबा री चाहत राखण वाळा नौजवानां अर समाज रा वंचित तबकां री जनता ने मजबूत बणावण सारु आगे आवण री अपील कीनी है। वे आज नई दिल्ली मांय शहरी सहकारी कर्ज रा बारा मांय राखी ज्यो अंतर्राष्ट्रीय सम्मेलन-सहकारी कुंभ 2025 रा उद्घाटन जळसा मांय बोल रह्या हा। श्री शाह कह्यो के पांच साल मांय दो लाख ऊं बत्ती आबादी वाळा हर कस्बा मांय एक शहरी सहकारी बैंक खुलणो चाहिए। वे कह्यो के नुवी पीढ़ी ने सहकारिता ऊं जोड़बा अर सहकारी हलका सारु पेशेवर तैयार करण रा मकसद ऊं सरकार त्रिभुवन सहकारी विश्वविद्यालय खोल्यो है। ई मौके श्री शाह अमूल अर इफको ने अंतर्राष्ट्रीय सहकारी गठबंधन री विश्व रैंकिंग मांय पहली दो ठौड़ां माथे रेहवण परां बधाई दीनी।

000

लोकसभा अध्यक्ष ओम बिरला आज कोहिमा मांय नागालैंड विधानसभा मांय राष्ट्रमंडल संसदीय संघ भारत क्षेत्र-3 रा 22वां सालाना सम्मेलन रो उद्घाटन कीनो। ई मौके वे कह्यो के देश रा पूर्वोत्तर हलका री समृद्ध संस्कृति, विविधता अर मजबूत लोकतांत्रिक मूल्यां सारु खास ओळखाण है। वे पूर्वोत्तर राज्यां री विधानसभावां रा ऐका अर हलका री जरूरतां रे मुजब नीतियां बणावण सारु वां री सराहवणा कीनी।

000

राष्ट्र गीत वंदे मातरम् रा डोढ़ सौ साल पूरा व्हेवण रा जश्न रा सिलसिला मांय प्रदेश मांय न्यारी-न्यारी ठोड़ां आज ई कार्यक्रम राखी ज्यो। जयपुर रा शासन सचिवालय मांय राखी ज्यो खास कार्यक्रम मांय मुख्य सचिव सुधांशु पंत कह्यो के वंदे मातरम् गीत डोढ़ सौ साल मांय देश री सांस्कृतिक, आध्यात्मिक

अर राष्ट्रवादी चेतना ने बधावो दीनो है। वे कह्यो के केंद्र सरकार ई गीत रा ऐतिहासिक महत्त्व रा बारा मांय जाग जगावण सारू राष्ट्रीय स्मृति पहल सरू कीनी है। ई दौरान सचिवालय परिसर मांय **एक स्थान, एक समय, एक गीत** थीम माथे अहलकार अर कर्मचारी मिल र 'वंदे मातरम्' गीत गायो अर खास तौर ऊं देश मांय बण्योड़ा सामान खरीदण री शपथ लीनी। जयपुर मांय पशुपालन विभाग अर पाली मांय जलदाय विभाग मांय दफतरां मांय ई अहलकार अर कर्मचारी मिल र राष्ट्र गीत गायो। झुंझुनू कलेक्ट्रेट परिसर मांय राख्यी ज्या कार्यक्रम मांय जिला कलेक्टर डॉ. अरुण गर्ग कह्यो के म्हाने आजादी री लड़ाई लड़बा वाळां रा बलिदान पाछे आजादी मिली है अर म्हाणी सेवा, समर्पण अर ईमानदारी सागे काम करण री ज़िम्मेदारी है।

000

ईलाज रा पारंपरिक तरीकां ने बधावो देवण रा मकसद ऊं आयुष मंत्रालय अर राज्य सरकार री ओर ऊं प्रदेश मांय आयुष्मान आदर्श ग्राम योजना चलायी ज्यी है। इण मांय प्रदेश रा दो सौ दस गांव चुणी ज्या है। आयुष्मान आदर्श ग्राम योजना रा पहला दौर मांय भरतपुर अर डीग ज़िला रा 10 गांव चुणी ज्या है। आं गांवां मांय जनता मांय स्वास्थ्य री सार-संभाळ रा बारा मांय जाग जगावण, बीमारियां री रोकथाम करण अर गांवां मांय जड़ी-बूटियां री खेती करण ने बधावो दियो जावेला। म्हाणा भरतपुर खबरनवीस बतायो के ई बाबत् हर गांव ने 10 लाख रुपया री मदद ई दी जा रही है।

000

पशुपालन अर गौपालन मंत्री जोराराम कुमावत आज पाली मांय दो नुवा शहरी आयुष्मान आरोग्य मन्दिरां रो उद्घाटन कीनो। ई मौके वे कह्यो के राज्य सरकार जनता ताई ईलाज अर स्वास्थ्य ऊं जुड़्या सुबीता पूगावण सारू सगळा जरूरी जतन कर रही है। वे गलथनी रा अणगौर मांय उपस्वास्थ्य केन्द्र रो नुवो भवन बणावण रा काम री नींव रख्यी। श्री कुमावत तखतगढ़ नगरपालिका हलका मांय शहरी आवास योजना रो फायदो लेवण वाळा 117 जणां ने 50-50 हजार रुपया री मदद रा चैक ई दीना।

000

प्रदेश मांय वोटर लिस्टां रा विशेष गहन पुनरीक्षण अभियान रा तैत काम मांय लापरवाही करण वाळा कर्मचारियां रे खिलाफ करड़ी कार्यवाही करी जा रही है। पाली ज़िला रा सुमेरपुर मांय बूथ लेवल अहलकार-बीएलओ कानी ऊं लापरवाही करण रा मामला मांय कार्यवाही करी ज्यी। जिला कलेक्टर 4 बीएलओ ने कारण बताओ नोटिस दीना है। श्रीगंगानगर मांय एसआईआर रे कारण चुनाव रा काम ऊं जुड़्या अहलकारां अर कर्मचारियां री छुट्टियां माथे रोक लगा दीरीजी है। झुंझुनू ज़िला मांय हाल ताई 23 फीसदी गणना प्रपत्र बांटी ज्या है।

000

प्रदेश मांय सड़कां माथे हिफाजत रा बारा मांय मोटर गाड़ियां चलावण वाळां मांय जाग जगावण सारू खास अभियान चलायो जा रह्यो है। इण ई सिलसिला मांय भीलवाड़ा ज़िला मांय हाई-वे माथे ई हिफाजत ऊं जुड़्यो खास अभियान चलायी ज्यो है। एस.पी. धर्मेन्द्र सिंह बतायो के खास तौर ऊं आप-आप री लेन मांय गाड़ियां चलावण माथे ज़ोर दियो जा रह्यो है, जिण रा तैत ट्रक सरीखी मोटी गाड़ियां ने डावां हाथ री अर नान्ही गाड़ियां ने बीचली लेन मांय चलावण बाबत् जाग जगायी जा रही है।

000

प्रदेश मांय अब सीळो बायरो बाजण लाग्यो है। इण रा असर ऊं घणखर ठौड़ां पारो 15 डिग्री सेल्सियस ऊं नीचे उतर ग्यो है। दस ठौड़ां रात री बगत तापमान 10 डिग्री सेल्सियस ऊं नीचे दर्ज करी ज्यो। मौसम महकमा रे मुजब सीकर ज़िला रा फतेहपुर मांय 6 दशमलव 8 अर नागौर मांय 9 डिग्री सेल्सियस न्यूनतम तापमान नापी ज्यो। मौसम महकमो 20 नवम्बर ताई राज्य मांय मौसम सूखो रेहवण रा आसार जताया है, हालांकि कठे-कठे धुंअर रो असर बधबा री संभावना है।

000